

Para	SKK 10 “GRANTET QEVERTARE DHE FORMA TË TJERA TË NDIHMËS” – PËRDITËSUAR (2023)
	OBJEKTIVI DHE BAZA E PËRGATITJES
1	Objektivi i Standardit Kombëtar të Kontabilitetit 10 <i>Grantet qeveritare dhe forma të tjera të ndihmës</i> (SKK 10), miratuar nga Këshilli Kombëtar i Kontabilitetit dhe shpallur nga ministri përgjegjës për financat, është dhënia e parimeve të njohjes, matjes dhe vlerësimit të mëposhtëm të granteve qeveritare dhe formave të tjera të ndihmës në pasqyrat financiare të përgatitura në përputhje me Standardet Kombëtare të Kontabilitetit. Standardet Kombëtare të Kontabilitetit bazohen në parimet e kontabilitetit dhe të raportimit financiar të pranuar në shkallë ndërkombëtare, kërkesat e përgjithshme të cilave përshkruhen në Ligjin për kontabilitetin.
2	SKK 10 është i krahasueshëm me Seksionin 24 – <i>Grantet qeveritare</i> të SNRF për NVM (2015). Një tabelë korresponduese e paragrafëve të Standardit Kombëtar me paragrafë të SNRF për NVM (2015) është dhënë në paragrafin 16. Për rastet që nuk janë trajtuar në mënyrë të drejtpërdrejtë nga SKK 10 ose ndonjë SKK tjetër, drejtuesit e njësisë ekonomike duhet që me miratimin e Këshillit Kombëtar të Kontabilitetit, të aplikojnë politika të tilla që sigurojnë një pasqyrim të vërtetë e të besueshëm të pozicionit financiar, performancës financiare dhe fluksit të mjeteve monetare të njësisë ekonomike, siç kërkohet në Ligjin për kontabilitetin.
3	Pasqyrat financiare do të përgatiten mbi bazën e konceptit të materialitetit. Standardet Kombëtare të Kontabilitetit nuk do të zbatohen për zërat jomaterialë. Parimi i materialitetit përkufizohet dhe sqarohet në paragrafët 64 deri në 68 të SKK 1.
	FUSHA E ZBATIMIT
4	Ky standard do të përdoret për trajtimin kontabël dhe shpjegimin e granteve qeveritare dhe formave të tjera të ndihmës.
5	Ky standard do të përdoret për përgatitjen e pasqyrave financiare nga ato njësi ekonomike, të cilat kanë marrë grante qeveritare ose forma të tjera ndihme. Parimet dhe kërkesat e paraqitura në këtë standard do të përdoren në lidhje me grantet qeveritare të marra nga organizma qeveritare, për sa kohë që këto organizma nuk janë aksionarë të njësisë ekonomike, si dhe kërkesat e SKK 10 nuk bien ndesh me SKK të tjera, që trajtojnë këto aspekte dhe sigurojnë një paraqitje të vërtetë e të besueshme.
6	Ky standard nuk trajton aspektet e mëposhtme: (a) trajtimi kontabël dhe shënimet shpjeguese të ndihmës qeveritare në pasqyrat financiare të ndihmë-dhënësit; (b) ndihmën qeveritare që i jepet një njësie ekonomike në formën e lehtësirave në përcaktimin e të ardhurave të tatueshme ose në formën e detyrimit të kufizuar tatimor. Shembuj të përfitimeve të tilla janë aktivitetet e përjashtuara nga tatimet, e drejta për kreditimin e tatimit mbi investimet e bëra, zbritja e amortizimit të përshpejtuar dhe norma të reduktuara të përqindjes së tatimit mbi fitimin (SKK 11 <i>Tatimi mbi fitimin</i>).
	PËRKUFIZIMET KRYESORE
7	Më poshtë jepen disa përkufizime të termave kryesorë të përdorura në këtë standard: <u>Ndihma</u> është një veprim i ndërmarrë nga një organizëm qeveritar, me synimin për t’i ofruar një përfitim ekonomik të veçantë një njësie ekonomike apo një tërësie njësisish ekonomike që plotësojnë disa kritere të përcaktuara. Shembujt përfshijnë këshillimin teknik ose të marketingut falas, sigurimin e garancive dhe huave me normë interesi zero ose shumë të ulët. Ndihmës nuk mund t’i caktohet një vlerë e arsyeshme. Ndihma e trajtuar në këtë standard nuk ka të bëjë me lehtësirat që ofrohen në mënyrë të tërthortë e që ndikojnë mbi tregëtinë në përgjithësi, si për shembull ofrimi i infrastrukturës në zona që kanë nevojë për zhvillim, vendosja e kufizimeve tregtare mbi konkurrentët, apo sigurimi i kushteve lehtësuese, si vaditjet ose rrjetëzimet e ujit, çka i ofrohet në mënyrë të vazhdueshme dhe pa dallim një komuniteti të tërë. <u>Grantet qeveritare</u> janë ndihmë e dhënë nga një organizëm qeveritar, në formën e transferimit të burimeve apo aktiveve të një njësie ekonomike, përkundrejt plotësimit në të shkuarën ose në të ardhmen të disa kushteve të paracaktuara që lidhen me aktivitetet e shfrytëzimit të kësaj njësie ekonomike. Këtu bëjnë përjashtim transaksionet me qeverinë, të cilat nuk mund të dallohen nga veprimet normale tregtare të njësisë ekonomike (për shembull, një prokurim nga ana e organeve qeveritare, nëpërmjet së cilës realizohet një pjesë e shitjeve të njësisë ekonomike). <u>Borxhet e falshme</u> janë borxhe, për të cilat huadhënësi merr përsipër të anulojë ripagesën e tyre, në varësi të plotësimit të disa kushteve të caktuara.
8	Grantet qeveritare ndryshojnë nga format e tjera të ndihmës pasi vlera e tyre monetare mund të përcaktohet relativisht me saktësi dhe mund të dallohet nga transaksionet e tjera të zakonshme tregtare të njësisë ekonomike.
	GRANTET QEVERTARE
	Njohja dhe matja e granteve qeveritare
9	Një njësi ekonomike i nje grantet qeveritare si vijon:

	(a) Një grant qeveritar që nuk imponon kushte të specifikuar të performancës në të ardhmen mbi përfituesin njihet në të ardhura, kur granti qeveritar është arkëtuar/përfituar. (b) Një grant qeveritar që imponon kushte të specifikuar të performancës në të ardhmen mbi përfituesin njihet në të ardhura vetëm kur kushtet e performancës janë plotësuar. (c) Grantet qeveritare të marra para se të plotësohet kriteri i njohjes së të ardhurave njihen si një detyrim.	
10	Një njësi ekonomike do të masë grantet qeveritare të përfituara me vlerën e drejtë të aktivitetit të marrë ose për t'u marrë.	
11	Një borxh i falshëm trajtohet si një grant qeveritar kur ka siguri të mjaftueshme që njësi ekonomike do të plotësojë kushtet e paracaktuara për faljen e borxhit.	
PARAQITJA NË PASQYRAT FINANCIARE		
12	Aktivet e marra ose të blera nëpërmjet granteve qeveritare njihen në pasqyrën e pozicionit financiar në të njëjtën mënyrë siç njihen aktivet e tjera të të njëjtit lloj.	
13	Të ardhurat dhe shpenzimet, që lidhen me grantet qeveritare, njihen në pasqyrën e të ardhurave dhe shpenzimeve në zërat "Të ardhura të tjera të shfrytëzimit/dhe shpenzime të tjera të shfrytëzimit" ose si zë më vete.	
SHËNIMET SHPJEGUESE		
14	Në shënimet shpjeguese të pasqyrave financiare duhet të paraqitet informacioni i mëposhtëm, në lidhje me grantet qeveritare dhe ndihma të tjera: (a) natyrën dhe shumën e granteve qeveritare të njohura në pasqyrat financiare; (b) kushtet e papërbushura dhe detyrimet e kushtëzuara të lidhura me grantet qeveritare që nuk kanë qenë të njohura në të ardhurat; (c) një përshkrim të formave të tjera të ndihmës qeveritare nga të cilat njësi ekonomike ka përfituar drejtpërdrejt.	
DATA E HYRJES NË ZBATIM		
15	SKK 10 <i>Grantet qeveritare dhe forma të tjera të ndihmës</i> , përditësuar në vitin 2023, do të zbatohet në pasqyrat financiare që mbulojnë periudha kontabël që fillojnë më ose pas datës 01.01.2025. Kërkesat e SKK 10 (2023) do të zbatohen në perspektivë.	
TABELA KRAHASUESE		
16	Tabela më poshtë tregon se si korrespondojnë paragrafët e këtij Standardi me SNRF për NVM (2015). Paragrafët janë konsideruar si korresponduese nëse ato trajtojnë në përgjithësi të njëjtën çështje pavarësisht nga fakti që seksionet e referuara mund të kenë ndryshime.	
	Paragrafët e SKK 10	
	Paragrafët e SNRF për NVM botuar në korrik 2015	
	Paragrafi 1	Asnjë
	Paragrafi 2	Asnjë
	Paragrafi 3	Asnjë
	Paragrafi 4	Sek 24.1
	Paragrafi 5	Asnjë
	Paragrafi 6	Sek 24.3
	Paragrafi 7	Sek 24.7; 24.2; 24.1
	Paragrafi 8	Sek 24.2
	Paragrafi 9	Sek 24.4
	Paragrafi 10	Sek 24.5
	Paragrafi 11	Asnjë
	Paragrafi 12	Asnjë
	Paragrafi 13	Asnjë
	Paragrafi 14	Sek 24.6
	Paragrafi 15	Asnjë
	Paragrafi 16	Asnjë